

2013-imi atuutilersussanik ilaasunik angallassineq pillugu sullissinissamik isumaqatiginninniarnertit atuutilersussat manna ingerlanneqartunut atatillugu nunatta kujataani piffissani sikorsuaqanngiffinni umiarsuit atorlugit ilaasunik angallassisinnaaneq, ukiullu sinnerani qulimiguullit atorlugit ilaasunik angallassisinnaaneq pillugu isumaqatigiissuteqarsinnaanermik Naalakkersuisut misissuinissamik pequneqarnissaannik Inatsisartuni aalajangiiffisassatut siunnersuut.
(Inatsisartuni ilaasortaqaq Anders Olsen, Siumut)

Akissuteqaat

(Ineqarnermut, Attaveqarnermut Angallannermullu Naalakkersuisoq)
Siullermeerneqarnera

Anders Olsen aalajangiiffisassatut siunnersuummik saqqummiussinerani qutsavigaara.

Siunnersuummi Assartuussineq pillugu Isumalioqatigiissitap isumaliutissiissutaani inassuteqaatit aammalu kommunimi illoqarfinnut nunaqarfinnullu angallavinni imaatigut angallassisinnaanermut periarfissat pillugit nassuiaanneqarnissamik Kommune Kujallermi innuttaasut kissaateqarnerat taperserpeqarput. Tamatuma saniatigut Qeqertarsuup Tunuani misilittakkat takutippaat, angallavinni imaatigut angallassinerup atuutsinneqalernera nunap immikkoortuani takornariaqarnermut iluaqutaasimasoq.

Tassalu Naalakkersuisut Kalaallit Nunaata kujataani imaatigut angallassinerup atuutsinneqalernissaannik kissaateqarneq paasilluarpaat.

Kisiannili kiffartuunneqarnissamik isumaqatigiissusiornissamat atatillugu Naalakkersuisut iliuuseqarnissamat pitsaanerpaanik angusaqarniarlutik tamakkiisumik pituttorsimanginnissaat pingaaruteqarpoq. Isumaqatiginninniarnertit ingerlanerini Inatsisartuni kiffartuunneqarnissamik isumaqatigiissutissatut kissaatigisavut oqallisigilissagutsigit, illuatungiliuttup politikikkut kissaatit aallaavigilersinnaavaat, taakkulu Namminersorlutik Oqartussanut isumaqatiginninniarnermi iluaqutiginiarsinnaallugit. Namminersorlutik Oqartussat taamaalillutik isumaqatiginninniarnerni sanngiinnerusumik inississapput. Taamaattumik kiffartuunneqarnissamik isumaqatigiissutissat isumaqatiginninniutigineqarnerini politikikkut suliassanik allaffissornikkullu suliassanik immikkoortitsinissarput pingaaruteqarpoq.

Matuma siuliani taaneqartut tunngavigalugit siunnersuutip itigartinneqarnissaa Naalakkersuisut inassutigaat.